

唐山縣志卷之三

祥異

景星卿雲在天者成象山車河馬在地者成形
瑞應每遇文明之世始克有之豈人力所能致
哉至二氣之祲五行之沴雖云偶然要惟修德
者乃能轉禍爲福祥以示慶異以示警感應之
機捷於影響攷之天官月令五行各經傳所書
往往徵驗在人惟修德立誠正所謂敬天而勤
民也志祥異

金承安二年夏旱邑民禱於崮山應期而雨秋穀未登民艱食神夜諭民曰山陽石盡爲麴矣掘之果然饑者賴以存活

明正德五年庚午黑眚大作爲厲

嘉靖十年辛卯先師廟產芝五色

三十年辛亥大風晝晦大木盡拔

三十九年大旱蝗飛蔽天斗粟銀三

隆慶三年己巳大水平地丈餘水落遺沙不可

耕稼虛糧爲累百姓苦之

萬曆十四年丙戌旱人饑瘟疫流行死者無數
二十四年丙申亦城村民家產白芝

三十四年大旱大荒野無青草

三十七年己酉大饑民食樹皮

三十八年庚戌春大旱發穀六百石賑之夏大
蝗戶部發銀一百九十六兩秋又發銀三千二
十九兩賑五千九百餘名

崇禎十三年大旱人饑瘟疫流行死者無算
十四年饑甚骨肉相食幾無子遺石獅生毛

十七年三月初八日大風晝晦

皇清順治五年四月大雹禾麥盡沒秋七月泝水橫
溢城社傾覆負郭田園俱被沙埋

十四年地震

十七年干言趙園牡丹華

遠邇鑒賞
者如市

康熙三年彗星疊見本年秋禾乾次年大水

七年地震有白氣亙天至秋泝水大溢田禾漂

沒蒙

總督部院白

諱

秉真踏勘水災請開援納

新例以賑饑民自七年十月起至八年二月終
每月每名給米六倉斗共賑饑民一千五拾九
名口是年錢糧蠲十分之三

又水衝沙壓地八十四頃零蒙

撫院金

諱

世德特疏請豁至十年除糧

十年八月趙氏園春海棠華

三月至六月不雨知縣孫纘申請旱災分別十
分八分蠲免有差

孫志曰水災之後民未獲蘇而旱魃爲虐汲汲
乎饑孥之載道矣爰察蠲賑之宜井者每發錢

十 緡掘井一眼可灌田二十畝共發錢五百緡掘井五百眼以資灌溉撫字心勞徒增浩嘆次年春 撫院金 發銀五十兩本縣捐俸三十兩又勸行義輪立粥廠三處以賑饑民康熙十四年爲旱災異常申請

蠲連閏共蠲銀一千二百三十八兩三分五釐七毫六絲九忽七微

十八年七月二十八日地動

十九年四月二十七二十八連日冰雹小如棗

栗大如雞卵五月六月旱民大饑米至三錢銀

一斗知縣朱魁釐糴米設粥廠煮米賑濟饑民

流離少安

十九年四月分爲東省連歲饑荒等事蒙

大名道梁 捐發賑濟饑民銀一百二十兩

本府殷 捐發賑濟饑民銀一百兩

大名府糧廳何 捐發賑濟饑民銀十兩

本縣朱 捐發賑濟饑民銀三十兩

又動支存倉穀四十石贖穀金斗二石二斗三

升八合八勺

本縣朱 又捐發賑濟饑民銀七十餘兩

共賑過已經申報實實饑民二千一百六十九

名口

以上係舊志

五十二年二麥大熟每畝石餘每斗錢五六十文秋又大熟雜糧每斗三四十文不等

乾隆年間麥秋時有鳥不知名鳴曰寶見則麥大熟

十八年大旱糧價昂貴黑豆每斗八九百文小麥每斗一千二百文

五十七年歲荒大饑民多餓死

嘉慶六年辛酉大雨河水氾濫田禾被淹平地
有魚蝦

七年壬戌蝗飛蔽天

十八年癸酉旱魃爲虐歲大饑人食樹皮知縣
童琬起詳請緩征放賑

二十三年戊寅夏四月先師廟產白芝

二十四年己卯秋七月大水冬十二月大雪平
地深三尺許

道光元年辛巳秋七月瘟疫流行人死無算

二年壬午秋七月大水三年六月間大雨七晝
夜泝水漲溢平地深尺餘四年大蝗縣出示買
蝻孽

十年庚寅春大旱四月二十九日風雨大作經
兩晝夜始止河水氾濫平地深尺餘牆屋多傾
圯

閏四月二十二日申刻地震雞犬鳴吠樓舍幾
傾

五月初五日黎明又震魁星閣傾圯

十四年甲午公子村民宅產靈芝

十五年乙未彗星見秋河水漲溢禾歉收

二十三年楊霍村生員牛文盛家產一異草首

如人指數七莖上白中黃下紅根如蘑菇祈問

乩仙云七指還陽丹

咸豐二年壬子正月二十日寅時地震門鈕相

擊有聲

三年癸酉秋禾大熟七月十八日風雨驟至晝

夜不止者七日河水氾濫倒塌民房無數

四年甲寅蝗蝻爲災

五年乙卯九月初七日丑刻地震如重車行自

北而南

六年丙辰蝗蝻爲災米貴民多流離

七年丁巳秋大蝗野無遺禾餓莩枕藉知縣王
明彝設粥廠令紳士盧煥賈天球於關外施粥
自十二月朔至次年二月朔止全活甚衆

十月初昏時有火毬大如盆墜於西轟然有聲

居民咸驚

同治元年壬戌春大旱四月二十二日大風晝
晦

二年冬雞夜鳴村村類然至次年春馬賊馳突
縣境

三年甲子農登麥鄉民獻麥秀兩歧

六年七月十五日中天有流火星自東而西落
地有聲乩仙云柳星發輝王兵變

八年己巳春夏無雨幾至赤地五月二十七日
得雨數寸農始播種秋又酷旱未得種麥

九年庚午春大旱多烈風麥未秀五月初七日
大風晝晦雨雹大木拔人有走入井者有凍死
田間者

十年辛未春無雨四月二十七日方雨始播種
六月二十九日大雨如注河水陡長氾濫近河
村莊牆垣室廬禾稼俱被淹知縣龔懷勘明災
歉分數詳奉給銀撫恤蠲免有差

十一年壬申自春至夏雨暘時若農登麥秋月

大雷電以風大木拔禾盡偃年景歉收

光緒三年丁丑春雨暘時若至四月初旬邪教
流行煽惑人心暗使妖術翦人髮辮身上戳印
不分男女頃刻眩暈昏倒口吐絲涎命幾不保
幸有所傳符咒或貼門戶或灌受害之人均昏
迷一二日卽愈後因各處查拏人民晝夜隄防
月餘乃息人心漸定

五六月間旱魃爲虐禾稼均未收成至秋後米
價昂貴紅梁黑豆每斗至八九百文

四年戊寅自春至夏雨澤愆期米珠薪桂餓殍

枕藉困苦顛連不可言狀兼之瘟疫時行傷人無數稟請賑濟民賴以安

按三年大饑四年春間斗米千錢民不堪命大名道黃發銀二千兩在縣立平糶局飭縣委派公正紳董赴山東採買雜糧各路分賑三月間又申請開預備諸倉按莊分賑同事紳董有文生李世英馬慎思武舉劉清元武生王成學廩生張振奎呂兆祥文生張青雲武生李萬福貢生趙維常士俊增生李汝玉均能急公好義任勞任怨民賴全活甚衆

兵變

晉定公十一年趙簡子圍邯鄲荀寅奔齊齊人納

寅於柏人

按柏人城卽今城西
十二里之亦城也

二十二年寅復奔趙遂奔邯鄲又奔柏人

趙幽繆王元年城柏人

漢高帝擊盧綰過趙貫高等壁人於厠帝問縣何
名左右皆曰柏人城曰柏人者迫於人也遂不
宿而去

更始元年王郎反光武自薊走信都發兵攻柏
人與王郎將李育戰於柏人之光泰岡大破之

按光泰岡在今
城西北六里許